

Gou Dwg Ndik Fwn Iq Ndeu

我 是 一 滴 小 雨 点

Gou dwg ndik fwn iq ndeu, doek fwn lo, daxgoeng byajraez caeuq daxbuz byajmig youq gwnz fwj rongx, heuh ndikfwn dou baiz doih ndei, boux riengz boux lumj bouxbing gyang-lozsanj nei diuq roengzbae. Gou soqlaiz mbeiiq, yaek lwnz daengz gou diuq lo, baenzlawz guh ha? Gou youq gwnz fwj yaemhywx yawj coh baihlaj, ha, daiq sang lo, doengzdoh ngamq roengzbae haenx yawj mbouj raen lo, gou lau raixcaix. Daxgoeng byajraez youq henz rongxhumhum, minghlingh gou diuq roengzbae, daxbuz byajmig youq henz gujli gou naeuz: "Baihlaj di ndeu cungj mbouj lau, vanzlij gig gyaendei dem." Gou dingq le, aensim

soeng hauilai. Doeklaeng gou siengj: Ndik fwn wng guh ndaej daengz, gou hix guh ndaej daengz, caiqgangj, hix mbouj hawj daxgoeng byajraez caeuq daxbuz byajmig saetmuengh ha! Siengj daengz neix, gou mbeihung lo, laep da couh diuq roengzbae.


Youq gyangmbwn, gou laep ndaet song da, mbouj gamj hai da, cij dingqnyi rumz youq henz rwz bongjhuhu. Menhmenh dwk, sing rumz yied daeuj yied iq, gou menhmenh hai da, ha! Lajbiengz laxlawz baenzneix gyaendei. Gou cingq ngonzyawj funghgingj gyaendei seiz, gou ngiengx gyaewj baez yawj, laxlawz ndik fwn wng hix riengz gou laebdaeb

diuq roengzdaeuj lo. Seizhaenx gou yawjraen ndikfwn beij gou roengz-daeuj gonq haenx: Miz mbangj cigsoh doek daengz gwnz dieg, nyinh cumx diegnamh; miz mbangj bae ndaw ndoengfaex, hawj gofaex gwn raemx imq le, gofaex yungh mbawfaex heuyauyau caeuq ngafaex maengh de vih dou damz hwnj yinhloz ndei dingq; miz mbangj bae daengz diegnywj, hawj go'nywj bienq ndaej engq heuoiq; miz mbangj bae ndaw suenva hoengzhoengz henjhenj, sawj dujva engq gyaendei lo. Gou menhmenh doek daengz ndaw diuz rij iq he bae, caeuq bya iq gungq iq daxcaez guhcaemz, caen angq ha!



Mbwn ciemhciemh gvengq lo, daengzngoeng okdaeuj lo, gou youh deng daxgoeng daengngoengz daiq baema lo, gou caen siengj caiq yienghneix daeuj youz baez he ha!

(roek nienzgaep Vangz Yauj-yangz)



Doxnyiengh

谦 让

Seizcin raeujrub youh daeuj-daengz lo, daegnuengx go'nywj daj ndaw rungj daxmeh daihdeih ndonj ok aen'gyaeuj, heuoiq daeuj. Dabsau vadauz launyaenq ndaej aennaj cungj nding lo, daeggo gofaex hix did ok nyod oi q daeuj, roegenq daj baihnanz mbin dauqma lo, cici caca heuh dwk, lumj dwg naeuz: "Seizcin daeuj lo, seizcin caen gyaendei!"

Duzdouq hau siengj: Ndit seizcin geijlai raeujrub ha, gou bae guhcaemz gonq! Duzdouq saetsaet diuqdiuq byaij gvaq giuzfaexdog, ngamq siengj byaij gvaqbae, yawjraen daxgoeng yiengz menhmenh daj baihlaeng de byaij gvaqdaeuj. Duzdouq hau gip-muengz naeuz: "Daxgoeng yiengz, mwngz dwg bouxlaux, mwngz gvaqbae gonq ba!" Daxgoeng yiengz naeuz: "Mbouj yungh law, duzdouq hau mwngz gvaqbae gonq ba."

Duzdouq hau doiq daxgoeng yiengz naeuz: "Daxgoeng yiengz, mwngz dwg bouxlaux, mwngz gvaqbae gonq!"

Daxgoeng yiengz riunyumnyum naeuz: "Duzdouq hau, mwngz caen dwg boux lwnyez ndei roxsoq rox doxnyiengh he ha!"

(ngeih nienzgaep Cangh Yez)

Rwed Raemx Ndae Majhung

浇水能长大

Mwhhaenx gou ndaej haj bi, miz ngoenz ndeu, lauxsae youwzyenz doiq dou naeuz: "Sou couh lumj gova iq nei, aeu lai rwed raemx, dwk bwnh, cij maj ndaej youh sang youh hung..."

Gou baez dingq couh angq lo: "Deng ha, nanzgvaig gij va ndaw ranz gou baenzhaenx gyaendei, laxlawz dwg daxgoeng gingciengz rwed raemx, dwk bwnh cij yienghneix gyaendei. Gou hix ndaej yienghneix majhung bw!"

Gangj guh couh guh, ma daengz ranz, gou couh hag gij yiengh daxgoeng ndaem va, sien genj aen batva hung ndeu, yienzhaeuh youq ndawhongh gud di namh cuengq youq henz. Cunjbei ndei le, gou duet haiz caeuq mad bae, ndwn haeuj ndaw batva, aeu namh hoemq din, yienzhaeuh aeu aen rokraemx ndeu, sien rwed din, gaendwk rwed gyaewj. Raemx daj gwnz gyaewj lae roengzdaeuj, liengzsis, gou

baez saenznit, caen gyoet ha! Hoeng siengj daengz couh yaek majhung, ndawsim gou mbouj rox geijlai angq ha!

Seizhaenx daxboh cingqngamj roengzban ma daengz ranz, raen gou ngawzngwd ndwn youq laj ndit, vanzlij sohsob ndwn youq ndaw batva, mbouj rox fatseng gijmaz saeh, couh dawz gou daj ndaw batva ngengh rag okdaeuj. "Mwngz ndwn youq ndaw batva guh gijmaz?" Daxboh gaenjgip dwk cam gou, "Yo, byoem hix dumz lo?" Gou haetwci mbat ndeu naeuz: "Lauxsae naeuz...naeuz, dou aeu lai...lai rwed raemx, dwk bwnh, cij...cij majhung, haet...haetwci!" Daxboh dingq le, riu dwk dungx in bae. Gou youq henz yawj cix gig geizheih. Daxboh itmienh riu itmienh rag gou daengz naj aengingq, gou yawjraen ndaw gingq byoem gou dumzdwddwd nem youq gwnz gyaewj, aennaj youh dumz youh uq, lij miz namh

dem, couh lumj duzmeuz ngamq daj ndaw mieng uq vax hwnjdaeuj nei. Mboujgvaq gou gag roxnyinh swheij lumjbaenz beij gyanghaet maj sang di lo, couh gag gangj gag naeuz: "Gij vah lauxsae lij caen lingz bw!" Daxboh riu dwk dawz buh hawq daeuj hawj gou vuenh, youh bang gou uet byoem hawq, yiengzhaeuh gvet aenndaeng gou naeuz: "Lwg huk, lauxsae mbouj-gvaq dwg yungh daeuj beijlumj, mwngz baenzlawz ndaej dang caen ne? Mwngz gaej gaenj, mwngz itdingh majhung."

Seizneix, gou couh yaek siujyoz bizyez lo, hoeng gij saeh seiziq lij ciengzciengz sawj gou siengj hwnj, moix baez siengj hwnj gij saeh neix, gou cungj nyaenx mbouj ndaej riu ok sing daeuj.

(roek nienzgaep Huz Sezingz)



Roengzdangz le, gyoengq doengzhag youq ndaw hagdangz hozdung, gyoengqde miz mbangj guh vut bausa, miz mbangj guh meuz gaeb nou, miz mbangj guh duzyiuh gaeb gaeqlwg, lij miz mbangj dwkgiuz. Gou gyaewz guh

Roengzdangz Hozdung

课 间 活 动

duzyiuh gaeb gaeqlwg. Siujmingz dang duzyiuh, gou dang gaeqmeh, gyoengq doengzhag wng dang gaeqlwg. Gaeqlwg beng geubuh riengz youq baihlaeng gou baenz baiz he, Siujmingz youq baihnaj gou yaep he buet gvaq baihgva, yaep he buet gvaq baihsuix, siengj banhfap gaeb gaeqlwg, gou iet song gen buekmingh baujhoh gyoengq gaeqlwg, gaeqlwg youq baihlaeng

gou ndoj gvaz ndoj swix, lauheiq deng duzyiuh gaeb dawz. Siujyinz ndoj ndaej menh, deng Siujmingz gaeb dawz lo, cijndei doiq okdaeuj, ndwn youq henz yawj. Byawz hix mbouj siengj deng gaeb, couh buekmingh buet. Dou guhcaemz ndaej gig angq. Cungj guhcaemz neix gig mizyinx, daihgva cungj gyaewz guh.

(ngeih nienzgaep Lij Gyahyz)